

Lij Ginhcwngz:

Bouxvanq Gij Ndit Swhfaz Minzcuz Vunznoix

□ Liengz Cingz raiz Dahdingz hoiz

Hawj gunghminz minzcuz vunznoix hengz gij gienzleih yungh vah minzcuz bonjfaenh dajgauq, hawj lwgminz Mbanjcuengh youq moix aen swhfaz anqgienth roxnyinh daengz goengbingz cingqngieih, hawj gij ndit swhfaz raeuj daengz dieg minzcuz lajmbanj bae. Neix dwg gij caensaed “fazgvanh Cuengh Gun song cungj vah” gih raeuz gamj rap caenguh, gamj cauhoq fugsah vnzlai lajmbanj.

Miz boux fazgvanh “ban 86” laeng baenzneix ndeu, de caprag lajmbanj, gvansim Mbanjcuengh, daiq aendoih Vahcuengh saemjbuenq gaenxmaenx damqra, cugyamq byaij ok diuz roen Vahcuengh cunzdauq saemjbuenq hab gij saehsaed minzcuz Ginhbwz Gih caemhcaiq gig miz daegsaek Mbanjcuengh ndeu.

De dwg boux fazgvanh yenzngeg song cungj vah Ginhcough Si Ginhbwz Gih Yinzminz Fazyen, boux fucwz Dasw Yinzminz Fazdingz Lij Ginhcwngz.

Caprag lajmbanj: Damqra gij vunqsi Vahcuengh saemjbuenq daplaeb diuz giuz song cungj vah ngaudoeng

Bi 2014 ndwen 9, Lij Ginhcwngz daj Bwzhaij Si Hozbuj Yen Yinzminz Fazdingz senjdih daengz Ginhcough Si Ginhbwz Gih Yinzminz Fazyen Dasw Yinzminz Fazdingz guhhong.

Dasw Yinzminz Fazdingz guenq Dasw, Daciz, Nazmungz, Gveidaiz seiq aen yanghcin, diegguenq gyauejvunz daengz 31 fanh vunz, ndawde gyauejvunz Bouxcuengh ciemq 70% doxhwnj, dwg Ginhcough Si dieg cujyau comzyouq Bouxcuengh, Vahcuengh dwg vah doxgangj cujyau dangdieg. Vih engq ndei gvancez guekgya minzcuz cwngecwz, doed ok gij banhfap bienhleih lwgminz ciuq daegsaek swhfaz, damqra hab dieg minzcuz daegdiemj, Ginhbwz Gih Yinzminz Fazyen youq gij giek sawqdiemj damqra cingqsiq youq bi 2017 ndwen 3 ngoenz 28 youq Dasw Yinzminz Fazdingz daiqdaez laeb aen fazdingz cunzdauq Vahcuengh Guengjsae caiqlj daengx guek aen nduj.

“Gou dwg vunz Fangzcwngzgangj Si, vahmbanj gou hix dwg Vahcuengh, yaem caeuq Vahcuengh bonjdieg Ginhbwz Gih mbouj ca geijlai, doxgangj ndaej.” Daj laebbaenz aen fazdingz cunzdauq Vahcuengh doxdaej, Lij Ginhcwngz cungfaen fatok gijndei vah ndanggaeuq, daiq aendoih Vahcuengh saemjbuenq youq mwh guhhong Vahcuengh cunzdauq saemjbuenq gaenxmaenx damqra, mbeihung cauhoq, ginggvaq song bi lai saemjbuenq



▲Aen fazdingz cunzdauq Vahcuengh cingq haidingz.

saedguh, cugyamq damqra ok aen vunqsi Vahcuengh cunzdauq saemjbuenq hab gij saehsaed minzcuz Ginhbwz Gih caemhcaiq gig miz daegsaek Mbanjcuengh ndeu.

Seizneix, Ginhbwz Gih Yinzminz Fazyen gungh miz 5 boux fazgvanh Cuengh Gun song cungj vah, gyoebaenz haj aen doih Vahcuengh saemjbuenq, vih gaijgez gij vwndiz vunzlai lajmbanj dajgauq roen gya, aen fazyen neix lij youq mbanj, gihveijvei laeb miz aen funghranz guhhong fazgvanh, daiqdaez aeu song cungj vah saemjbuenq ietraez daengz cunhveijvei, mbanj, hawj gij ngaekngeu cengnauh vunzlai youq bakdou ranz couh ndaej gaijgez.

Dingjmaenh cingqngieih: Song vah gangj fapleix song din cunz minzcingz

“De guekgya swhfaz gaujsi gauj ndaej 454 faen, dou haenh de dwg boux ‘hag ak’, lijjun suijbingz haemq sang caeuq saemjbuenq saedhengz gingniemh fungfouq.” Ginhbwz Gih Yinzminz Fazyen fazgingj Dwng Vanhoz lwnh gicej, Lij Ginhcwngz dwg ciennieb hag faplwd, gwnz aen daiz guhhong de cawz vwnzgen le, lij daeb miz haujlai saw faplwd, de cungj dwg giengzdiuh aeu mbouj dingz hagsib vuenhmoq faplwd cihsiz cij ndaej riengz hwnj yamqdin seizdaih.

Gicej roxyiuj daengz, Lij Ginhcwngz banhleix anqgienth soqlaiz mbouj lujlai roengz gietlwnh, gietlwnh okdaej le lij fanfoek lwnhcingq, ceng’aeu caenh rengz ndanggaeuq, hawj boux dajgauq hingz rox cingcing cujcuq, hawj boux dajgauq saw sim fug bak fug bae, youq bi 2019 ndwen 1

miz aen anqgienth mouseng dai yinxfat habdoengz gaicawx cengnauh ndeu, bouxdenggaug Nungz moux dajgauq saw le mbouj roxyiuj, daiq geij boux baengzyoux caez bae fazdingz ra Lij Ginhcwngz fazgvanh aeu gangjap, simcingz gikdoengh raixcaix. Lij Ginhcwngz yiedcingz cingj gyoengqde haeuj funghranz diuzgaij, caemhcaiq aeu mbawsaw buenqgiet caeuq mizgven faplwd gvidingh okdaej, ciuq anqgienth nyinhdingh saedsaeh, soucomz baengzgawq, buenqgiet yienzaen, faplwd habyungh caeuq saemjbuenq cwngzsi yungh Vahcuengh gejgangj hawj Nungz moux, caemhcaiq baenz aen baenz aen vwndiz gejdap hawj gyoengqde. Couh yienghneix fanfoek yungh Vahcuengh gejgangj faplwd diuzvwnz, mboujdan Nungz moux roxyiuj le gij yienzaen dajgauq saw, baengzyoux caeuq Nungz moux caez daej haenx hix roxyiuj lo. Doeklaeng, Nungz moux naeuz fug lo caemhcaiq dangciengz aeu gij cienz mbawsaw buenqgiet gvidingh haenx hawj, anqgienth ndaej gietsat lo.

Bi 2018, Lij Ginhcwngz gungh banhleix anqgienth 253 aen, saemjgiet 253 aen, gietanq cingzsoq 100%, youq ndaw anqgienth buenqgiet gietanq dan miz 75 aen, anqgienth mbouj miz saek aen loekca.

Lij Ginhcwngz lij roengzrengz raiz mbawsaw caizbuenq, gyaepgouz mbawsaw caizbuenq siengjap yiemzmaed, doengsug rox ngaih, mbawsaw buenqgiet minzsah (2015) Ginhbwz minzcuhsw daih 28 hauh de raiz haenx ndaej bi 2016 daengx gih fazyen mbawsaw caizbuenq maenhndei sam daengjciengj; mbawsaw

caizbuenq (2018) Gveiq 0703 minzcuh 118 hauh ndaej bingz baenz bi 2019 daengx gih “bak bien mbawsaw caizbuenq maenhndei”. Aenvih guhhong ndei, de lij youq bi 2019 ndaej bouxvunz sam daengjgoeng.

Ginhcough Fazyen: Laebdin aen fazdingz cunzdauq Vahcuengh swhfaz vanq nditrongh

“Geij bi neix daej, aen fazyen dou yungh cauhoq, hezdiuz, saekloeg, hailangh caeuq giemhaw huzndei, saemjbuenq siujsim, simndei leixniemh guh dazyinx, baengh minzcuz cwngecwz dangj, yungh bienh minz leih minz, gaijgez cengnauh guh moegbiu, laeb aen fazdingz cunzdauq Vahcuengh, haiguh baenzroix hong Vahcuengh saemjbuenq caeuq swhfaz fugsah miz daegsaek, aeundaiej ndawbiengz yaugoj ndei, hix ndaej daengz gihgvanh gaep baihgwnz caeuq ndawbiengz gak gyaiq haenh.” Ginhbwz Gih Yinzminz Fazyen dangjcuq suhgi, yencangj Cauz Gozhingh gaisau naeuz.

Cauz Gozhingh naeuz, Ginhbwz Gih Yinzminz Fazyen aeu hong Vahcuengh cunzdauq saemjbuenq dangguh aen gunghcwngz diemjrongh ndeu, mboujduenh giengzvaq gij ligdoh hong aen hangh neix, cwngecwz nyenggonz gunnganq fazgvanh song cungj vah, yawjnaek hwnjguh aendoih vunzcaiz, goengrengz doxgaiq boiqhawj caeuq dakdaih nyengqgonz coh aendoih song cungj vah, dajcauh gij vanzging guhhong ndei.

Ginhcough Si Cungaep Yinzminz Fazyen dangjcuq suhgi, cwngecibu cujyin Cinz Leiz naeuz, daj binggeq song cungj vah “Laujsuh” daengz bouxcoz Lij Ginhcwngz, Dasw Yinzminz Fazdingz itloh aeu song cungj vah saemjbuenq dangguh gij dieg caphaeuj coihawj minzcuz doxgiet cinbu, lai soujduenh lai bouhmonz lienzhab doidoengh, guhhong cingzceik yienhda, aen fazdingz neix hix baenz dieg Ginhcough Si Cungaep Yinzminz Fazyen gunnganq vunzcaiz song cungj vah. Cinz Leiz naeuz, youq coglaeng guhhong, Ginhcough Si Cungaep Yinzminz Fazyen yaek caenh’ itbough gyagiengz sonyinx Ginhbwz Gih Yinzminz Fazyen, guhndei aen gihci guhhong caeuq aen gihci gikcoi, aeu hwnjguh aen fazdingz cunzdauq Vahcuengh Dasw guh baenz dieg guhyiengh aen fazdingz cunzdauq Vahcuengh Guengjsae, cungfaen fatok gij cozyung Vahcuengh saemjbuenq, hawj gij nditrongh swhfaz ciuq ndaej engq gyangq, raeuj sim lwgminz Mbanjcuengh.